

ԿԸ ՄԻԱՆԱՆՔ

Posted on November 25, 2021 by Keghart



Category: [Opinions](#)



Ռսկան Միհրթարեան, Լոս Անճելըս, 25 Նոյեմբեր 2021

Անմիջապես մեր մտքին մեջ կը ծագի ա՛յն հարցումը թէ այս բարձրաստիճան եկեղեցականները ինչի՞ կը միանան, ի՞նչ հեղինակութամբ եւ բարոյական ի՞նչ սկզբունքներու վրայ հիմանաւորուած կը կատարեն իրենց յատարարութիւնը: Վերլուծենք այս երեւոյթը աւելի պարզ դարձնելու համար մեր ընթերցողներուն:

Վերջին շաբաթներուն՝ Հայաստանեայց Առաքելական Եկեղեցոյ թեմերէն ներս ծառայող՝ Երուսաղէմի Սրբոց Յակոբեանց միաբանութեան նախկին անդամներ (նախկին կը կոչեմ որովհետեւ՝ այժմ անոնք կը նկատուին Մայր Աթոռի միաբաններ եպիսկոպոսական կարգ ստանալէ ետք) կը միացնեն իրենց բողոքի ձայնը այն դէպքի մասին, որ է « *Կովերու պարտեզի*» տարածքին հիւրանոց կառուցելու վարձակալութեան համաձայնագրի հարցը: Այս հերոս եպիսկոպոսները կուզան իրենց բողոքի ձայնը միաձնելու ա՛յն 12 միաբաններուն (երկուքը արդէն հրաժարած են բողոքելէ) որոնք բողոքի նամակ մը ստորագրած էին յայտարարելով որ իրենք տեղեակ չեն պահուած այս որոշումի մասին որովհետեւ այս հարցը ո՛չ Տնօրէն Ժողովի եւ ո՛չ ալ Միաբանական Ընդհանուր Ժողովի քննարկման առարկայ եղած է եւ հետեւաբար՝ կատարուածը անօրինական է եւ հակառակ միաբանական կանոնագրութեան ոգիին եւ բովանդակութեան:



Archbishop Vicken Aykazian, Archbishop Khajag
Barsamian, and Archbishop Kisag Mouradian

Որպեսզի մեր ընթերցողը աւելի մօտէն ճանչնայ կանոնագրութեան բովանդակութիւնը կը մեջբերենք զայն: Կանոն Միաբանական Ուխտի Յօդ. 67

« ... Մէկէն մինչեւ քսանհինգ տարի ժամանակաշրջան ընդգրկող համաձայնագրերը պիտի ստորագրուին նուազագոյն երեք անձերու կողմէ՝ Պատրիարք Սրբազան Հօր (Ս. Աթոռը թափուր ըլլալու պարագային, Տեղապահի կամ Պատրիարքական Փոխանորդի), Լուսարարապետի, Տնօրէն ժողովի ատենապետի եւ Կալուածոց տեսուչի կողմէ, իսկ քսանհինգէն առաւելագոյնը քառասունինը տարիներուն՝ նուազագոյնը երեք անձերու կողմէ՝ Պատրիարք Սրբազան Հօր (Ս. Աթոռը թափուր ըլլալու պարագային, Տեղապահի կամ Պատրիարքական Փոխանորդի), Լուսարարապետի, Միաբանական ժողովի ատենապետի եւ Տնօրէն ժողովի ատենապետի կողմէ: Ասոնցմէ Պատրիարք Սրբազան Հօր (կամ Տեղապահի), Միաբանական Ընդհանուր ժողովի ատենապետի ստորագրութիւնները պարտաւորիչ են»:

Թեւ մենք վերապահօրէն կը «գնահատենք» վերեւ նշուած բարձրաստիճան եկեղեցականներուն մտահոգութիւնները եւ սակայն կը փափաքինք տեսնել այս բոլորը աւելի մեծ պատկերի մը մէջ: Ի վերջոյ իրենք ալ կը հաւատան եւ վկայեն իրենց յայտարարութեամբ, որ Սրբոց Յակոբեանց Միաբանութիւնը իր կալուածներով եւ մանաւանդ իր մշակութային գանձերով կը պատկանի հայ ժողովուրդին, որուն բարօք պահպանութիւնը վստահուած է զինուորեալ միաբանութեան:

Հետեւաբար՝ հարց տանք մեր սրբազան հայրերուն.- Նոր՞ արթնցաք ձեր թմբիրէն: Ադեօ՞ք չէիք նկատած որ ամբողջ Հայց. Առաքելական Եկեղեցին գահավիժումի մէջ է: Ուր՞ էիք մինչեւ հիմայ երբ Մայր Աթոռէն ներս վերջին 22 տարիներուն ամէն տեսակի կանոնագրային խախտումներ տեղի կունենային: Թարմացնելու համար ձեր յիշողութիւնը նշեմ մի քանին.-

1.- Տարիներ առաջ երբ Սրբոց Յակոբեանց Միաբանութիւնը, գլխաւորութեամբ Նուրիան Պատրիարք հօր, որուն անդամ կը հաւակնիք ըլլալ երբ որ ձեզի յարմար է, խնդրանք ներկայացուց Ամենայն Հայոց Գարգին Բ. Կաթողիկոսին որ իր երկու տարեց վարդապետները, Սամուէլ եւ Պարեոտ Ծ. Վարդապետները եպիսկոպոս ձեռնադրուին: Ո՛չ որ ակնկալեց որ անկախ Նուիրապետական Աթոռէ եկած խորանք մը պիտի մերժուէր Կաթողիկոսին կողմէ ի՛նչ ի՛նչ հաշիւներով: Հիմայ հարց տամ անգամ մը եւս. ուր՞ էիք սրբազան հայրեր երբ ձեր աւագ եղբայրները զրկուեցան եպիսկոպոս ըլլալու պատիւէն երբ անոնք՝ առաւել քան 50 երկար տարիներ ծառայած էին խորանին եւ ազգին: Ինչու՞ չի բողոքեցիք այս անարդարութեան եւ կանոնական խախտումին դէմ:

2.- երկար տարիներու գահակալութեան իր տարիներուն, Գարեգին Բ. Կաթողիկոս իր

սուրը ճօճելով երիտասարդ կորովի միաբանների զանազան պատճառներով, չըսելու համար յերիւրանքներով, կարգազուրկ հռչակեց ակելի քան 100 միաբաններ, որոնց գլուխ գործոցը 25 տարիներու ծառայութիւն ունեցող Մոսկուայի առաջնորդ՝ Տիրան արքեպիսկոպոսին հեռաձայնային կարգազրկումն էր (այս մասին շատ գրած եմ եւ մանրամասնելու հարկ չեմ տեսներ) ուր՞ էիք դուք կանոնագրութեամբ մտահոգուած եպիսկոպոսներդ: Չկրցա՞ք բողոքել կատարուած այս խոշոր կանոնագրային խախտումին դեմ, թէ կը վախնայիք որ կրնայիք կորսնցնել ձեր երերուն աթոռները: Կը յիշէ՞ք ձեր ակազ եղբօր՝ Երանաշնորհ Մեսրոպ Պատրիարքին բողոքի նամակը Գարգին Բ. Կաթողիկոսին այս առիթով: Կրնա՞յ ըլլալ որ յիշողութեան տկարութիւն ունիք:

3.- Գարեգին Բ. Կաթողիկոսի գահակալութեան 22 տարիներու ընթացքին բազմիցս անգամ Գերագոյ Հոգեւոր Խորհուրդի անդամներու փոփոխութիւններ տեղի ունեցան: Դուք շատ լաւ գիտէք որ այդ բոլորը հակականոնագրային են եւ այդ բոլորը կը կատարուին Կաթողիկոսի կամակատարութեամբ եկեղեցին վերածելով իր անձնական շահաբեր հաստատութեան: Հիմայ հարց տամ անգամ մը եւս. դուք շատ լաւ գիտէք որ Գերագոյն Ժողովի անդամ ընտրելու իրաւաւունքը Ազգային Եկեղեցական Ժողովին կը պատկանի (Ժողով մը որ տարիներէ ի վեր չէ գումարուած), հետեւաբար ինչու՞ չբողոքեցիք կանոնագրային այս խախտումներուն դեմ. Կը վախնա՞ք դահիճէն թէ ձեր աթոռներու սիրոյն չբացիք ձեր «բժախնդիր» բերանները:

4.- Խաժակ սրբազան՝ ձեր առաջնորդական տարիներուն Գարեգին Բ. Կաթողիկոս իրաւագրկեց թեմական առաջնորդները իրենց թեմերէն ներս քահանայ ձեռնադրելու իրաւունքէն, ինչ որ իւրաքանչիւր թեմական առաջնորդի արդար իրաւունքն էր. Դուք բողոքեցի՞ք այս անարդար եւ հակականոնական որոշումին դեմ. անշուշտ Ո՛չ: Եւ տակաւին Թեմերէ ներս կանոնագրային փոփոխութիւններու սպառնալիքները, որուն ականատես եւ ականջալուր վկան եղաք ձեր թեմէն ներս. Բողոքեցի՞ք այս անօրինականութեան դեմ. Անշուշտ Ո՛չ: Բարեբախտաբար քաջարի եւ ազնիւ աշխարհական ամերիկահայ հայորդիներ դիմադրեցին այս ոտնցքութեան դեմ եւ դուք ձեր երերուն Աթոռը պահելու համար լռեցիք:

5.- Սրբազան հայրեր, ինձի այնպէս կը թուի որ ձեր յիշողութիւնները փթացած են: Կրնամ շարքը երկարել բոլոր կանոնական խախտումներուն որոնք տեղի ունեցան վերջին 22 տարիներուն, բայց պիտի բաւարարուիմ օրինակ մը կամ վկայութիւն մը եւս յայտնելով: Կը յիշէ՞ք ձեր ակազ միաբանակից եղբայրը՝ Նորվան սրբազանը ինչպէս խայտառակուեցաւ փարիզի օդակայանին մէջ, ի ներկայութեան բարձրաստիճան հիւրերու եւ հոգեւորականաց դասուն: Տարիներու վաստակ ունեցող առաջնորդի մը հանդէպ ա՛յս պիտի ըլլար Կաթողիկոսին վերաբերմունքը, այդ ալ անփառունակ քահանայի մը համար: Ի վերջոյ պէտք չէ՞ բացականչենք՝ ՀՈՒՐԹԱՍ ՀԱՅ ԵԿԵՂԵՑԻ: Այս առիթով Նուրհան Պատրիարքին նամակը կը յիշէ՞ք: Եթէ արդար չէր Նուրհան Պատրիարքին անկեղծ պոռթկումը ինչու՞ չբողոքեցիք: Սա կը նշանակէ որ

դուք համաձայն էիք Նուրհան Պատրիարքի բողոքի սամակին բայց անկարող զորավիզ կանգնելու ձեր «միաբանակից» եղբոր...անցնինք:

Հետեւաբար՝ մեր խնդրանքն ու յորդորը հետեւեալն է. եթէ իսկապէս կուզէք որ Հայց. Առաքելական Եկեղեցին վերաշխուժանայ իր առաքելութեան մէջ, ցոյց տուէք ձեր բժխանդութիւնը բոլոր կանոնական խախտումներու պարագային որպէսզի Եկեղեցին վերագտնէ իր հմայքը եւ մեր սիրելի Ժողովուրդին յարգանքն ալ վերականգնուի եկեղեցականներու հանդէպ: Ձեր սգեմները չեն կրնար ձեզ փրկել, ձեր մարդկային ազնիւ, հեզ ու խոնարհ նկարագիրն է որ միայն կրնայ արժեցնել ձեր առաքելութիւնը եթէ իսկապէս կը հաւատաք անոր:

Սեղմէք [Save the Lands](#) յայտնելու համար ձեր զօրակցութիւնը

There are no comments yet.